

Pressematdeellung vum 20. Abrëll 2020

... oder wéi geet et weider mat eise Geriichter, Madamm Tanson?

Zënter dem 16. Mäerz leeft net méi vill op eise Geriichter, fir net ze soe guer näischt méi. Schon den 12. Mäerz sinn d'Affekoten informéiert ginn, datt de Gros vun de Sëtzunge vum 16. Mäerz un annulléiert gëtt. Aner Circulären an natierlech Règlements d'urgence sinn nokomm, mam Resultat, datt zënter Ufank vum Confinement de Fonctionnement vun eise Geriichter op Null erofgeschrauft ginn ass.

Wat bedeit dat fir de Justiziabelen?

Ma déi Situatioun ass einfach onméiglech a carrement net ze justifizéieren.

Et gi Leit, déi waarden op hiert Urteel, dat heescht, dat sinn Affären, déi schon am Délibéré sinn, wou näischt déi zoustänneg Richter drun hënnert, dat Urteel ze schreiwen an ze verschécken. An trotzdem sinn d'Prononcé vum deenen Affäre bis op Weideres ausgesat ginn. Firwat? Kee weess et, a kee versteet et.

Et gi Leit, déi waarden drop, datt hir Affär drukënt. Och hei ass alles am Vagen. Affären, déi fixéiert waren, net nëmmen am Mäerz, net am Abrëll, mee carrement am Mee, sinn entretemps ofgesot ginn, ouni datt een neien Datum kommunikéiert ginn ass. Déi Justiziabel wëssen einfach net, wat geschitt.

Net ze schwätze vun deene Leit, déi elo eng nei Affär wéilte beim Geriicht areechen. Och do kritt ee keen Datum genannt. Dat heescht, et gëtt och keng Sëtzung fixéiert, mam Resultat, datt de Schued vun deem, dee kloer wëllt, ëmmer méi grouss gëtt.

Et ass schon zënter ëmmer bekannt, datt Retarden op eise Geriichter bestinn, mee mat deem „Stau“, deen am Moment geschaf gëtt, gëtt de bekannte Problem just nach méi schlëmm.

Firwat ginn eis Geriichter net erëm op? Natierlech mat den néidege Moosname vun Distanz an Oppassen. Oder, falls dat net méiglech ass, firwat schaffen eis Geriichter, wéi wa si nach net am 21. Joerhonnert ukomm wäeren? Firwat ginn d'Sëtzungen net iwwert Skype, Facetime, Teams, oder aner Dispositiffe gehalen? Firwat ginn déi Affären, déi ënner schrëftlecher Prozedur lafen, net einfach iwwer Mail a Berodung geholl?

Madamm Minister, d'ADR constatéiert, datt Dir lech ganz rar gemaach hutt an der leschter Zäit. Är Ënnerschrëft daucht zwar wuel niewent där vun eisem Grand-Duc op de Règlements d'urgence op, mee soss héiert a gesäit een net vill vun lech. D'ADR mengt, datt et héich Zäit wier, datt Dir lech ëm d'Geriichter an d'Richter këmmert, fir datt d'Justiziabel zu hirem verdéngte Recht kommen. Mat oder ouni Coronavirus, et kann net sinn, datt e Service public wéi d'Justiz quasi net méi funktionéiert.